

Il Patriarcjât e la Patrie dal Friûl

Nuie, o scuasit nuie, di ce che pai storics talians al va sot il non di "rinassince daspò il Mil" al po sei considerât slargjât al Friûl: particolârs events e particolârs condizions a diferenziin la nestre storie intai ultins timps de Ete di Mieç ritardant cussì di pôc mancul che di doi secui cierts procès carateristics de storie taliane, altris indi limitin o a modifichin cetant chescj aspiets, altris inmò ju lassin fûr dal dut. No un risvei di civiltât e culture latine si po olmâ, se mai il cjapâ pît di un aspri clime gjermanic; no une incessite de plebe a traviers la costituzion di libaris comunitâts, ma il slargjâsi di un implant stretementri feudâl; no un svilup dai centris citadins, ma une lente riprese de vite rurâl e la ricostruzion dai paîs e dai cjistiei intes campagnis za devastadis des incursions dai Ongjars.

Doi ordins di fats, in cualchi mût coincidints, a diferenziin, inte storie dal Friûl, il secul X e indi determinarin une svolte violente: lis scorsadis dai Ongjars – lis plui disastrosis, forsit, fra lis tantis che la Regjon e à paidît in ducj i timps – e il graduâl instituîsi dal principât temporâl dai patriarcjis. I Ongjars, tra l'an 899 e la mitât dal secul daspò, a faserin de fasse plui popolose e ative dal Friûl un desert; ai patriarcjis ur tocjà il compit pesant di ripuartâ e tornâ a organizâ la vite in chê desolazion. Une storie gnove, cun aspjet politics, sociâi e economics ben diviers di chei di prime, si invie aduncje pal Friûl viers la mitât dal secul X. Il domini temporâl de Glesie di Aquilee si realizà mediant un procès che al à dome scjars riscuintris in altris Paîs e il altris timps e che al cjate la sô spiegazion juste apont intes condizions di grande desolazion creadis in Friûl des scorsadis dai Ongjars. Possessions e privileçs di diviers gjenars, ma no inmò in misure tâl di costituî la figure juridiche dal feut, a jerin za stâts concedûts ai patriarcjis fint dai timps di San Paulin e confermâts e slargjâts dai sucessôrs di Carli il Grant e dal stes Berengari. Altris inmò, plui consistentes, a forin concedûts dai Otons, grancj partidants dal feudalism eclesiastic. Soredut inte seconde mitât dal secul X, i borcs e i cjistiei ricostruîts o fondâts su lis ruvinis des incursions, par opare dai patriarcjis, o forin afidâts ae custodie e ae amministrazion de lôr cort o famee, ven a stâi ai "ministeriâi", che a meterin adun cussì il prin grop de nobiltât locâl.

Inte albe dal secont mileni lis possessions patriarcjâls a jerin une vore sparniçadis dentri un teritori nominalmentri sometût al cont. In fats no si fevele plui di "marcje dal Friûl", ma ben invece di "contee" leade ae marcje di Verone e al ducât di Bavarie o di Carintie. Dut câs i patriarcjis a larin simpri plui slargjant lis oparis di ricostruzion e partant il lôr domini, domandant, di volte in volte, ai imperadôrs la conferme legâl des ocupazions cussì realizadis. Fintremai che lis sengulis concessions si saldarin tra di lôr creant cussì un teritori unît simpri plui slargjât, cun dome cualchi isolade jurisdizion dal cont. Il caratar legâl dal feut intes mans dai patriarcjis si va fissant tal timp dal patriarcje Popo (1019/1045), che al scomençà ancje a bati monede proprie. In fin al ven ricognossût de autoritât imperiâl cul diplome di Indrì IV al patriarcje Sigjeart (3 di Avrîl dal 1077): e nas cussì la Patrie dal Friûl.

I cuatri secui di vite dal principât patriarcjâl – dal principi dal XI al principi dal XV – si puedin dividi in doi periodis: un di slargjament e di infuarciment, sot i

patriarcjis todescs e ghibelins; e un di crisi e di decjadence, sot i patriarcjis talians e guelfs. In fats fint ae mitât dal Dusinte i patriarcjis a forin ducj todescs, apartignints a grandis cjasadis feudâls, dispès in parintant o almancul oms di cort dai stes imperadôrs e lôr partidants ancje intes lotis e intai contrascj cuintri il pape. La protezion imperiâl e la poie dai Grancj Siôrs di di là des monts, oltri a favorî il slargjament dal principât, al sigurave la discipline e la fedeltât dai tancj vassai minôrs. Invezit tal periodi che al vignì daspò, coincidint cuntune lungje crisi dal Imperi, i patriarcjis nomenâts dai papis di Rome o di Avignon, si cjatarin di fat bandonâts a se stes e obleâts a une continue lote cuintri i nimîs esternis e cuintri i tradiments dai cjastelans locâi : prin fra ducj, de sdrume dai ribei, il cont di Gurize – avocat de Glesie di Aquilee – che pes sôs slargjadis possessions oltri lis monts al jere simpri in podê di voidâ une pericolose oposizion e nol scuindeve, gran, la ambizion di rivâ a someti dut il Patriarcjât ae sô plene jurisdizion.

Ancje il cuadri etnic e culturâl si propon diferent intai doi periodis. In doi secui e mieç di Patriarcjât todesc la imigrazion di ecclesiastics, di feudâi, di soldâts, di nodârs e di marcjadants des regjons di di là des monts e fo dabon numerose e e contribuì a marcâ in maniere nete la flusumie nordiche dal popul furlan. Invezit, a partî dal timp di Gregori di Montlungje e soledut cui trê Torians, lis puartis dal Patriarcjât a forin viertis a mestris, traficants, clerics, professioniscj, dispatriâts politics talians di dutis lis regjons.

L'aspriet plui impuartant dal Patriarcjât al è che il Friûl al podê risurì da une situazion intrigose divignude des scorsadis dai Ongjars. Chest si propon come un fat fundamentâl se si ten cont che la planure e jere restade dal dut disabilitade e a tornâ a logâle e coltivâle i patriarcjis a scugnirin clamâ dongje des comunitâts di Slâfs. Di chest fat o cjatin testimoniance evident inte toponomastiche de zone a misdì di Udin, fint al bas cors dal Taiament.

Ce che invezit al puartà al amont dal podê temporâl dal Patriarcjât (al colà tal 1420) a forin lis simpri plui cressints disconcuardiis internis e lis vueriliis cence fin, massime cu lis sioriis di di là des monts. Dut chest al puartà a une depression economiche, cu la interuzion dal traspuart des marcjanziis, e la consequent dificolât di podê furnî i marcjâts. Oltri a chest si zontarin i dams ai raccolts e la multiplicazion des spesis. Cheste situazion di crisi pesante e fo il principâl fatôr de colade dal podê politic dai patriarcjis. E Vignesie naturalmentri indi aprofità, ocupant e sometint la Patrie tal Autun dal 1420.

(Josef Marchet – da "Il Friuli: uomini e tempi" – test ridusût e voltât par furlan par cure de redazion Ladins dal Friûl, n° 8 di Avost 2014)